

- संसद रो बजट सत्र राष्ट्रपति रा अभिभाषण सागे सरु व्हयो—वे भरोसो जतायो के विकसित भारत जी राम जी कानून गांवाई हलकां रा विकास ने और तेज करेलां
- राज्य विधानसभा मांय राज्यपाल वां रा अभिभाषण मांय सामाजिक सुरक्षा अर कृषि कल्याण समेत न्यारा—न्यारा मुद्दां माथे सरकार री सोच बतायीं
- प्रधानमंत्री नरेंद्र मोदी कह्यो—देश रा नौजवान हिम्मत अर प्रतिबद्धता ने देश—प्रथम री सोच सागे परिभाषित करे हैं
- मौसम विभाग प्रदेश रा ऊगणी हलकां मांय व्ही बिरखा पाछे ठिठुरन बधबा रा आसार जतायां

000

संसद रो बजट सत्र आज राष्ट्रपति द्रौपदी मुर्मू रा अभिभाषण सागे सरु व्हयो दोन्यू सदनां री भेली मीटिंग मांय राष्ट्रपति कह्यो के गांवाई हलकां मांय नौकरी—धंधा रा मौकां अर विकास सारु विकसित भारत जी—राम—जी कानून बणायी ज्यो हैं राष्ट्रपति कह्यो के नुवा कानून रा तैत गांवां मांय साल मांय सवा सौ दिन री मजूरी री गारंटी री व्यवस्था तैय करी ज्यी हैं श्रीमती मुर्मू कह्यो के सरकार री लगातार कोशिशें उं देश मांय करीब 95 करोड़ लोगां ने अब सामाजिक सुरक्षा योजनावां रो फायदो मिल रह्यो है जद के साल 2014 री सरुआत री बगत ओ केवल 25 करोड़ लोगां ने ई मिल रह्यो हों

000

विधानसभा रो बजट सत्र आज राज्यपाल रा अभिभाषण सागे सरु व्हयो राज्यपाल वां रा भाषण मांय सामाजिक सुरक्षा, कृषि कल्याण अर दूजा मुद्दां रा बारा मांय सरकार री सोच सामी रखीं वे कह्यो के प्रदेश मांय सवा करोड़ उं बत्ता लोगां ने जनता रा भला सारु केंद्र अर राज्य सरकार कानी उं चलायी जा रही योजनावां रो सीधो फायदो मिल रह्यो हैं श्री बागड़े कह्यो के प्रधानमंत्री किसान सम्मान निधि रा तैत राज्य रा 71 लाख उं बत्ता किसानां ने अब सालाना नौ हजार रुपया री माली मदद दी जा रही हैं राज्यपाल भण्डाई—लिखाई अर स्वास्थ्य रा हलका मांय खास उपलब्धियां रो जिकर करता थकां कह्यो के प्रदेश मांय पीएम श्री स्कूलां ने और बेहतर बणायी जा रही है, जिण रो 63 लाख उं बत्ता विद्यार्थियां ने फायदो मिल रह्यो हैं वे कह्यो के स्वास्थ्य उं जुड़ी सेवावां ने और चोखी बणावण सारु इंटर स्टेट पोर्टेबिलिटी रो सुबीतो मुहैया करायी ज्यो है, जिण उं प्रदेश री जनता ने दूजा राज्यां मांय ई मुफ्त ईलाज मिल सकेलां वे बतायो के गांवाई हलकां मांय माली व्यवस्था ने मजबूत बणावण सारु प्रदेश मांय एक हजार करोड़ रुपया रो डेयरी इंफ्रास्ट्रक्चर डेवलपमेंट फंड बणायी ज्यो हैं श्री बागड़े कह्यो के राज्य सरकार नौजवानां रो भविष्य उजळो बणावण सारु जरूरी सगळा जतन कर रही हैं

.....

राज्यपाल रा अभिभाषण पाछे सदन मांय लारला दिनां देवलोक व्ही हस्तियां ने सिरधाभाव सागे याद करीजीं ई पाछे सदन री कार्रवाई काल ताई टाळ दीरीजीं ई बीचे संसदीय कार्यमंत्री जोगाराम पटेल आज राज्यपाल रा अभिभाषण रे दौरान विपक्ष रा सदस्यां री टोका—टाकी माथे नाराजगी जतायीं खबरनवीसां सागे बातचीत करता थकां वे कह्यो के विपक्ष ने राज्य रा विकास सारु वां री सोच सरकार ने बतावणी चाहिजें वे कह्यो के राज्य सरकार जनता उं करी ज्या करीब 70 फीसदी वायदा पूरा कर दीना हैं

.....

विधानसभा अध्यक्ष वासुदेव देवनानी री सदारत मांय आज सदन री कार्य सलाहकार समिति री मीटिंग व्ही मीटिंग मांय व्ह्या फैसला रे मुजब सदन मांय काल अर शुक्रवार ने राज्यपाल रा अभिभाषण माथे

बहस व्हेलां 31 जनवरी, 01 अर 02 फरवरी ने छुट्टी पाछे 04 फरवरी ने मुख्यमंत्री राज्यपाल रा अभिभाषण माथे बहस रो जवाब देवेलां ई पाछे विधानसभा री कार्यवाही सप्ताह भर सारू टाळ दी जावेलां एक सप्ताह री छुट्टी पाछे 11 फरवरी ने बजट पेश कर्यो जावेलां

0000

राजस्थान युवा नीति-2026 ने असरदार तरीका ऊं लागू करण सारू आज जयपुर मांय अंतर्विभागीय समन्वय बैठक राख्यी ज्यीं इण मांय राजस्थान युवा बोर्ड रा अध्यक्ष नीरज के. पवन कह्यो के ई नीति रो मकसद 15 ऊं 29 साल ताई रा नौजवानां री विकास रा कामां मांय भागीदारी तैय करणो हैं वे कह्यो के ई नीति रा तैत भणार्ई-लिखाई, कौशल विकास, डिजिटल दक्षता अर नवाचार समेत सात खास बातां माथे ध्यान दियो ज्यो हैं

0000

सरिस्का बाघ अभ्यारण्य रा क्रिटिकल टाइगर हैबिटेट यानी रा नुवा मसौदा रा बारा मांय गांव वाळा ऊं मिली 100 ऊं बत्ती आपत्तियां रा बारा मांय प्रशासन वन विभाग ऊं जवाब मांग्यो हैं गांव वाळा कुछ गांवां ने खास हलका अर बफर जोन ऊं बाहर करण री मांग कीनी हैं वे नुवा मसौदा रे कारण वठे रा काम-धंधा अर कारोबार माथे गलत असर री शंका जतायी हैं

000

प्रधानमंत्री नरेंद्र मोदी कह्यो के देश रा नौजवान आज हिम्मत अर प्रतिबद्धता ने देश-प्रथम री सोच सागे परिभाषित करे हैं वे आज नई दिल्ली मांय वार्षिक एनसीसी पीएम रैली मांय बोल रह्या हां प्रधानमंत्री कह्यो के एनसीसी ऐडो आन्दोलन है जो देश रा नौजवानां ने खुद माथे भरोसो करण वाळा, अनुशासित अर देश रा प्रति समर्पित नागरिक बणावे हैं वे कह्यो के दुनिया भारत रा नौजवानां ने घणा भरोसा ऊं देखे है जो वां री होशियारी अर संस्कृति रे कारण हैं देश भर रा कैंडेटां अर अहलकारां ने बधाई देता थकां श्री मोदी कह्यो के लारला कुछ बरसां मांय एनसीसी री ताकत मांय बधोतरी व्ही हैं

000

प्रदेश रा ऊगणी हलकां मांय लारला चौबीस घंटा रे दौरान व्ही बिरखा पाछे अब ठिटुरन बधबा रा आसार हैं मौसम विभाग रे मुजब झालावाड़ ज़िला रा मनोहर थाना मांय सब ऊं बत्ती 26 मिलीमीटर बारिश दर्ज करी ज्यीं मौसम केंद्र जयपुर रे मुजब आवता कुछ दिनां मांय प्रदेश रा घणखर हलकां मांय पारो 3 ऊं 4 डिग्री सेल्सियस ताई और उतर सके हैं महकमो काल अर 30 जनवरी ने कठे-कठे घणी धुंअर रेहवण रा आसार जताया हैं 30 जनवरी ने राज्य रा उतराद अर ऊगणी हलकां मांय ओजू बादळां री गाज़ सागे बिरखा व्हेवण री संभावना हैं धुंअर रे कारण दूर ताई निज़र नी आवण री शंका ने ध्यान राखता थकां मोटर-गाड़ियां चलावण वाळां ने खास सावचेती राखण बाबत् कही ज्यो हैं

000

पाली ज़िला रा गांवां मांय पीएम कुसुम योजना रा तैत सूरज री रोशनी ऊं बिजली बणावण री मशीनां लगायी जा रही हैं ज़िला रा 33 गांवां मांय हाल ताई करीब 57 मेगावॉट बूता री मशीनां लगा दीरीजी हैं म्हाणा खबरनवीस बतायो के इण ऊं रोजीना करीब 2 लाख यूनिट बिजली पैदा करी जा रही हैं

000

जैसलमेर मांय काल मरु महोत्सव सरू व्हेलां एक फरवरी ताई जैसलमेर, पोकरण, सम अर खुहड़ी मांय चालण वाळा ई महोत्सव रा पहला दिन पोकरण रा नेपालेश्वर महादेव मिन्दर मांय आरती करी जावेला अर किला ऊं शोभायात्रा निकाळी जावेलां महोत्सव रे दौरान मिस्टर डेजर्ट, मिस मूमल, ऊंट दौड़ अर लोकनृत्य री होड़ां राख्यी जावेलां हाथ री कारीगरी ऊं बणायी ज्यो सामान रा मेळा सागे कलाकार भांत-भांत रा कार्यक्रम पेश करेलां

000

जोधपुर मांय काल राज्य स्तर रो बड़ली भैरुजी पशु मेळो सरू व्हेलां मुख्यमंत्री कानी ऊं लारला साल रा बजट मांय करी ज्यो ऐलाण रे मुजब भर रह्या तीन दिन रा ई मेळा मांय मारवाड़ी नस्ल रा घोड़ा, ऊंट अर थारपारकर गायां समेत दो हजार ऊं बत्ता ढांढा-ढोर लायी ज्यो हैं मेळा मांय पशुपालकां सारू सत्तर दुकानां लगायी ज्यी है, जठे वां ने भांत-भांत रा नुवा कामां री जाणकारी दी जा रही हैं एक फरवरी ताई चालण वाळा ई मेळा मांय सांस्कृतिक कार्यक्रम अर ऊंट-घोड़ा रा नाच खास रेहवेलां

000